

VENDIM
Nr. 5, datë 15.1.2018

**PËR DHËNIEN E MANDATIT TË DEPUTETIT TË KUVENDIT TË SHQIPËRISË
KANDIDATIT TË LISTËS SHUMEMËRORE TË PARTISË DREJTËSI, INTEGRIM
DHE UNITET NË QARKUN ELBASAN, PËR PLOTËSIMIN E VAKANCËS SË
NJOFTUAR NGA KUVENDI I SHQIPËRISË**

Komisioni Qendror i Zgjedhjeve, në mbledhjen e datës 15.1.2018, me pjesëmarrjen e:

Klement	Zguri	kryetar
Denar	Biba	zëvendëskryetar
Bledar	Skënderi	anëtar
Edlira	Jorgaqi	anëtare
Gëzim	Veleshnja	anëtar
Hysen	Osmanaj	anëtar
Vera	Shtjefni	anëtare,

shqyrtoi çështjen me:

Objekt: Për dhënien e mandatit të deputetit të Kuvendit të Shqipërisë kandidatit të listës shumëmemërore të Partisë Drejtësi, Integrim dhe Unitet në Qarkun Elbasan, për plotësimin e vakancës së njoftuar nga Kuvendi i Shqipërisë, pas heqjes së mandatit të deputetit të z. Aqif Rakipi.

Kërkues: Kuvendi i Republikës së Shqipërisë.

Baza ligjore: Neni 23, pika 1, germa “a”; neni 164, pika 2, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar; të nenit 11, të ligjit 138/2015, “Për garantimin e integritetit të personave që zgjidhen, emërohen ose ushtrojnë funksione publike”.

KQZ-ja, pasi shqyrtoi dokumentacionin e paraqitur dhe dëgjoi diskutimet e përfaqësuesve të partive politike,

VËREN:

Nëpërmjet shkresës nr. 57/1 prot., datë 10.1.2018, drejtuar KQZ-së, Sekretari Përgjithshëm i Kuvendit, z. Genci Gjonçaj, njofton krijimin e vakancës për shkak të pavlefshmërisë dhe përfundimin e parakohshëm të mandatit të deputetit të Kuvendit të Shqipërisë, të z. Aqif Rakipi, deputet i zonës zgjedhore Qarku Elbasan.

Neni 164 i Kodit Zgjedhor përcakton se në rast të ndërprerjes së mandatit të deputetit, Kuvendi njofton KQZ-në për krijimin e vakancës dhe KQZ-ja merr vendim për dhënien e mandatit kandidatit të radhës në listën shumëmemërore të së njëjtës parti politike, në zonën zgjedhore përkatëse, regjistruar sipas nenit 67 të Kodit Zgjedhor.

Komisioni Qendror i Zgjedhjeve, me vendimin nr. 555, datë 26.7.2017, shpalli rezultatin përfundimtar të zgjedhjeve për Kuvendin e Shqipërisë, datë 25.6.2017, si dhe miratoi listën shumëmemërore të deputetëve të zgjedhur për çdo subjekt për çdo zonë zgjedhore. Sipas vendimit të sipërcituar, Partia Drejtësi, Integrim dhe Unitet, për zonën zgjedhore Qarku Elbasan, për zgjedhjet për Kuvendin e Shqipërisë të datës 25 Qershor 2017, ka fituar 2 mandate dhe kandidatët fitues nga lista shumëmemërore e Partisë Drejtësi Integrim dhe Unitet, Qarku Elbasan, është si më poshtë: me numër rendor 1 (një), z. Aqif Kahraman Rakipi; dhe 2 (dy) z. Bujar Shahin Muça.

KQZ-ja, me vendimin nr. 573, datë 6.12.2017, “Për dhënien e mandatit të deputetit të Kuvendit kandidatit të listës shumëmemërore të Partisë Drejtësi, Integrim dhe Unitet, Qarku Elbasan, për plotësimin e vakancës së njoftuar nga Kuvendi i Shqipërisë”, vendosi dhënien e mandatit kandidatit të radhës me numër rendor 03, në listën shumëmemërore të Partisë Drejtësi, Integrim dhe Unitet, Qarku Elbasan, znj. Elena Josif Xhina, pas dorëheqjes së z. Bujar Muça.

Rezulton se lista shumemërore e Partisë Drejtësi, Integrim dhe Unitet, Qarku Elbasan, i plotëson të gjitha kriteret e përcaktuara në nenin 67 të Kodit Zgjedhor, duke përfshirë dhe kriterin e gjinisë. Në këto kushte zëvendësimi i vakancës do të bëhet sipas përcaktimeve të nenit 164, pika 2, të Kodit Zgjedhor, me kandidatin e radhës. Gjithashtu, konstatojmë se vakanca nuk i përket një mandati të fituar sipas pikës 6, të nenit 67, të Kodit Zgjedhor, për të zbatuar përjashtimin e përcaktuar në nenin 164, pika 2, të Kodit Zgjedhor, fjalia e dytë.

Për sa më sipër, mandati i ndërprerë duhet t'i kalojë kandidatit vijues të listës shumemërore, të Partisë Drejtësi, Integrim dhe Unitet në zonën zgjedhore Qarku Elbasan.

KQZ-ja, me vendimin nr. 287, datë 5.5.2017, "Për miratimin e listave shumemërore të Partisë Drejtësi, Integrim dhe Unitet, për zgjedhjet për Kuvendin e Shqipërisë, datë 25.6.2017", ka miratuar listën shumemërore të Partisë Drejtësi, Integrim dhe Unitet, për 12 zonat zgjedhore.

Sipas listës shumemërore të Partisë Drejtësi, Integrim dhe Unitet, Qarku Elbasan, kandidati i radhës është kandidati me numër rendor 04 (katër), z. Dritan Abedin Bici.

Z. Dritan Abedin Bici, me cilësinë e kandidatit të listës shumemërore të Partisë Drejtësi, Integrim dhe Unitet, në zonën zgjedhore Qarku Elbasan, ka depozituar formularin e vetëdeklarimit në KQZ, si organi kompetent për administrimin, verifikimin, zbatimin e ndalimeve për zgjedhjen dhe emërimin në funksionin publik.

Në zbatim të ligjit nr. 138/2015, "Për garantimin e integritetit të personave që zgjidhen, emërohen ose ushtrojnë funksione publike" dhe kreut V, pika 2, germa "b", dhe pikës 3, germa "c", të vendimit të Kuvendit nr. 17/2016, "Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015", KQZ-ja, me shkresat nr. 34 prot., datë 9.1.2018, ka kërkuar informacion nga zyra e gjendjes gjyqësore dhe me shkresën nr. 2448 prot., datë 1.5.2017, ka kërkuar informacion nga zyra e gjendjes civile, për funksionarin publik që ka dorëzuar formularin e vetëdeklarimit në KQZ.

Nga verifikimi i të dhënave në formularin e vetëdeklarimit të z. Dritan Bici, në cilësinë e kandidatit për deputet të subjektit politik Partia Drejtësi, Integrim dhe Unitet, Qarku Elbasan, rezulton se është dënuar nga Gjykata e Rrethit Gjyqësor Elbasan, me një vendim gjyqësor të formës së prerë, nr. 382 datë 19.9.2013, për veprën penale "Mosbindja ndaj urdhrit të punonjësit të policisë së rendit publik", parashikuar nga neni 242 i Kodit Penal, dhe ndaj tij është caktuar masë dënimi: "Punë me interes publik", parashikuar nga neni 63/1 i KP-së.

Sipas shkresës nr. 3541/1, datë 6.7.2017, informacionit të ardhur nga Zyra e Gjendjes Civile, rezulton se z. Dritan Bici nuk ka kryer ndryshime në gjenealitetet e tij.

Sipas shkresës nr. 63/1, datë 10.1.2018, të ardhur nga Zyra e Gjendjes Gjyqësore, në KQZ rezulton se z. Dritan Bici, në bazë të vendimit nr. 382, datë 19.9.2013, Gjykata e Rrethit Gjyqësor Elbasan e ka deklaruar fajtor për veprën penale: "Mosbindje ndaj urdhrit të policisë së rendit publik", parashikuar nga neni 242 i KP-së dhe neni 406 i KPRP-së, dënohet me 1 (një) muaj burgim. Në zbatim të nenit 63 të KP-së zëvendësohet dënimi me punë në interes publik prej 80 orësh.

Në bazë të nenit 69 të KP-së është rehabilituar.

Referuar nenit 2, të ligjit nr. 138/2015, "Për garantimin e integritetit të personave që zgjidhen, emërohen ose ushtrojnë funksione publike":

Ndalimi për kandidim dhe për t'u zgjedhur në një funksion të lartë publik

1. Nuk mund të kandidojnë dhe as të zgjidhen deputetë në Kuvendin e Shqipërisë, kryetar bashkie apo këshilltar në këshillin bashkiak dhe, në çdo rast, nuk mund të marrin një funksion me votim nga Kuvendi, përfshirë funksionin e Kryeministrit apo anëtarit të Këshillit të Ministrave, apo me votim nga këshillat bashkiakë ose të qarkut, personat të cilët janë dënuar me burgim me vendim të formës së prerë, brenda apo jashtë territorit të Republikës së Shqipërisë, për: a) kryerjen e veprimeve apo mosveprimeve që përbëjnë veprë penale, sipas neneve 73, 74, 75, 76, 77, 78, 78/a, 79, 79/a, 79/b dhe 79/c, 86, 87, 88, paragrafi i dytë, 89/a, 100, 101, 102, 102/a, 103, 104, 105, 106, 109, 109/b, 109/c, 110/a, 111, 114,

128/b, 135, 136, 140, 141, 143/a, 215, 216, 217, 218, 219, 220, 221, 222, 230, 230/a, 230/b, 230/ç, 231, 232, 232/a, 232/b, 233, 234, 234/a, 234/b, 278, paragrafin e parë, të pestë e të gjashtë, 278/a, 282/a, 283, 283/a, 284/a, 287, i lidhur me kryerjen e një krimi të parashikuar në këtë paragraf, 333, 333/a e 334 të Kodit Penal; b) kryerjen e veprimeve apo mosveprimeve që përbëjnë vepër penale, sipas neneve 110/c, 244, 245, 248, 248/a, 259, 260, 319, 319/ç apo në fushën e zgjedhjeve, të parashikuar në kreun X, “Vepra penale që prekin zgjedhjet e lira dhe sistemin demokratik të zgjedhjeve”, të Kodit Penal; c) kryerjen e një krimi, që nuk përfshihet në shkronjat “a” dhe “b”, të kësaj pike, për të cilin janë dënuar me jo më pak se 2 vjet burgim; ç) për kryerjen me dashje të një krimi që nuk përfshihet në shkronjat “a” dhe “b”, të kësaj pike dhe kur janë dënuar me jo më pak se 6 muaj burgim.

Referuar nenit 2, të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, të dhënat e deklaruara në formularin e vetëdeklarimit dhe informacionit të ardhur nga Drejtoria e Përgjithshme e Burgjeve dhe Drejtoria e Përgjithshme e Gjendjes Civile, të kandidatit të radhës të subjektit politik, Partia Drejtësi, Integrim dhe Unitet, z. Dritan Abedin Bici, nuk përfshihet në kushtet e ndalimit të zgjedhjes në funksionin e deputetit, sipas këtij ligji.

Për sa më sipër, mandati i ndërprerë i përket kandidadit të radhës, i renditur me numër rendor 04 (katër) në listën shumëmemërore të Partisë Drejtësi, Integrim dhe Unitet në zonën zgjedhore Qarku Elbasan, z. Dritan Bici.

PËR KËTO ARSYE,

Komisioni Qendror i Zgjedhjeve, mbështetur në nenin 23, pika 1, germa “a” dhe nenin 164, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar; të nenit 11, të ligjit 138/2015, “Për garantimin e integritetit të personave që zgjidhen, emërohen ose ushtrojnë funksione publike”,

VENDOSI:

1. T’i japë mandatin e deputetit të Kuvendit të Republikës së Shqipërisë, kandidatit të radhës në listën shumëmemërore të Partisë Drejtësi, Integrim dhe Unitet, Qarku Elbasan, z. Dritan Abedin Bici.
2. Ky vendim hyn në fuqi menjëherë dhe botohet në Fletoren Zyrtare.
3. Kundër këtij vendimi mund të bëhet ankim në Kolegjin Zgjedhor, pranë Gjykatës së Apelit Tiranë, brenda 30 (ditë) ditëve nga shpallja e këtij vendimi.

KRYETAR
Klement Zguri